

IDENTITÀ E VOLONTARIAT

Al Socors da mont, developei de cher

L'Union di Ladins de Fascia ge a dedicà la Festa del Rengraziament ai omegn e la femenes che porta socors a la jent tel pericol. A chisc volontères ge è stat sport na statua de legn de Sènt'Ugèna



Sun paladina del tendon de Ischia l salut e i intervenc de l'autoritèdes coi president Brunel e Polam.

Fotos Ermanno Mich



Gino Comelli e Sergio Valentini tel confront vidà da Alison Prinoth.



L'Union di Ladins de Fascia ge a sport l rengraziament ai capistazion del Socors da mont, al Aiut Alpin Dolomites e ai relatores.



Ai gropes de Socors ge è stat sport la statua de Sènt'Ugèna.

Bèsta pech per se sentir pèrt de na comunanza e soraldut bèsta pech per se dir developei. Bèsta demò na parola. Na parola che è vegnuda dal cher, enstadi, en ocazion de la Festa del Rengraziament de l'Union di Ladins de Fascia. L. developei più gran e dal cher ge è jìt ai gropes de Socors da mont, a duc i omegn e la femenes che fora per dut l an è semper a la leta per portèr socors a chi che se troa tel pericol sun noscia crepes. A ic e eles, developei.

Dapò ben segur a duc chi che à didà, se à metù a la leta, tel picol e tel gran: a don Mario Bravin, al Cor de geja e i letores percheche l ladin a rersonà bel e adaut te la liturgia; al Club Pietrone per la bona marena e l servije ezelent; a la Musega da

Poza e duc i gropes de folclor e de voluntariat che con sia prejenza à viventà la festa; al grop de joegn de Ciampedel e Cianacei per sie contribut; a duta l'autoritèdes che à palesà sia vejananza: a la firmes che à dat sie sostegn. E ben segur a duc chi che tel acort o te sie picol à pissà, lurà, metù eif e mans per l andrez e per l bon eijt.

Te la messa ladin a i valores del voluntariat

La Festa del Rengraziament de l'Union di Ladins è tachèda ite con la defilèda che è pontèda via da Piazz de Ciampedel per compagnèr la jent sun geja. Chiò te na bela messa per ladin don Mario à uzà fora i valores del voluntariat, de chi che fèsc la

robes zenza se englorièr e zenza presunzion, descheche ne disc ence l Vangele do Sèn Luca. «L.Segnoredio ne à insegnà a preèr per nos, no per me» à dit don Mario. Sun utèr tel ofertorie l è stat portà ence i èrc di volontères del Socors e l è stat preà percheche l Segnoredio l vèrde via, che i posse portèr inant sie servije semper en segurezza.

Fernando Brunel: tegni su l lengaz ladin

Do messa, compagnè da la bela sonèdes de la Musega de Poza, duc se à tramudà jun Ischia olache l Comun de Ciampedel e l Comitad manifestazion a ori e sciudà l tendon per ge dèr lèrga a la festa. Chiò l è stat l moment ofizial coi saluc e i

intervenc de l'autoritèdes. L president Fernando Brunel à metù dant en curt la lingia de ativitèdes culturèles, editorieles e sui social che la soziazion à portà inant via per chest an 2022, ence cheles interladines e con la colaborazion de enc e istituzions de la val. Tlultima Brunel à uzà fora n apel: «Tegni su l lengaz ladin e duralo te vigni moment: te majon, te piazz de pais e ti momenc ofizie de la comunanza. Rejonèr coche carena nosc lengaz l è n onor». L president de l'Union Generala di Ladins dila Dolomites Antone Polam e duta la autoritèdes, l ombolt de Ciampedel Ivo Bernard, l vize procurador Nazario Micheluzzi, l conseier provinzièl ladin Luca Guglielmi, la presidenta de la Majon di Fascegn Lara Battisti, l Sorastant Federico Corradini e la presidenta de l'Autorità per la mendranzes Katia Vasselai ge à sport sie developei ai voluntadives del Socors da mont che è semper vertesc a corer, no demò te la gran desgrazies, cheles che fèsc notizia.

Passà e davegnir del Socors da mont

L moment de la marena, enjgnèda con cher e profesionalità dal Club Pietrone de Cianacei, l è stat l'ocajion per i omegn e la femenes del Socors de se troèr, condivider idees e esperienzes. Pecià che mencià chi de la stazion de Moena e Soraga ajache proprio en chel di i è stac chiamè sul Lagorai à didèr a chierri na persona che se à perdù.

Recore, stories, esperienzes e vijions è states metudes dant tel moment de confront vidà da Alison Prinoth che à domanà fora Sergio Valentini, alpinist, menacrep e ex operator del Socors e Gino Comelli, co-fondador del Aiut Alpin Dolomites e amò operator atif. Duc doi à recordà i vères inant che l è stat fat te chisc egn per chel che vèrda la massaries, la procedures de intervent, i mesi. «Fin di egn '50 l era doi paroles – i à dit – salvament e recuperament, ma de spes l era recuperament de jent che era jà morta percheche per ora che se ruèa sul post l era massa tèrt. Dut l è mudà con la दौरa del jolier con intervenc più asvelc e l

medico diretamente sul post. N'outa ge volea vint persones e se stajea fora na di entria, ades bèsta manco persones e per la maor pèrt di intervenc dut vegn serà su te niente n'ora.»

«Enlouta no l era l sostegn psicologich – à dit Comelli – l era senester jir a tor su i morc sa mont, a cèsa i capia nosc padimont, no i domaneà nia. Canche aon vedù che duta la valèdes ladines aea i medemi problemes se aon metù ensem a se aon andrezà col jolier del Aiut Alpin Dolomites; i prum istà aon fat 60 intervenc, ades n vegn fat 500 e n auter gran vèrech inant l è stat aer i visores per fèr i socors ence de net.» Colun è l davegnir del Socors? à domanà Alison. «Gé veide che l è joegn che vegn do – à dit Valentini – chel de se didèr fora un col auter l aon te l'èma. L problem maor l è la spezializazion che tol via n muie de temp.»

«Ge vel fèr prevenzion, tachèr da la scoles – à jontà apede Comelli – portèr i joegn sa mont e ge fèr veder olache i vif per ge fèr amèr l teritorie, demò cossita i lo respetarà e i empararà la regoles per jir sa mont.» L cher se à strent canche l president Antone Polam, che l è ence socoritor, à recordà i momenc senestres canche l è stat da ge portèr socors ai amisc Tita, Marco, Alessandro, Diego, Erwin e Luca.

L developei ai voluntadives del Socors

L'Union di Ladins ge a sport a Stefano Coter, Luigi Zulian e a Luca Debertol (per la stazion de Moena vidèda da Thomas Zanoner) na statua de Sènt'Ugèna con vindò l mont simbol de si pajies, zipièda da Paolo Costazza: l Vernel, la Torns del Vaiolè e l Om. Con comozion la vize presidenta Nicoletta Riz ge à consegnà la statues col ge augurèr che la Sènta Patrona de Fascia li vèrde semper via. Ence l grop joegn de Ciampedel e Cianacei, per ouisc de Anna Lazer, à volù rengrazièr i volontères del Socors col ge sporjer na medea de legn con la frasa de Sofocle: «fèr del ben con chel che se à e se pel, l è l'opera più nobolar.»

Monica Cigolla



La defilèda de gropes e jent rua sun geja de Ciampedel.



Dantfora la bandiera de l'Union di Ladins de Fascia.



I volontères del Socors da mont.



Tel ofertorie l è stat portà sun utèr i simboi del Socors.